

utusan Malaysia 2017/7/2022 (Page 6)

# CCTV awasi pangkalan haram

Oleh **ROHANA ISMAIL**

utusannews@mediamulia.com.my

**TUMPAT:** Pemilik pangkalan haram di sini yang terlibat dalam kegiatan penyeludupan bertindak memasang kamera litar tertutup (CCTV) bagi memantau pergerakan pasukan keselamatan dan mengelak lokasi itu diserbu.

Menerusi CCTV itu, pemilik kawasan tersebut akan mengarahkan penyeludup untuk terus meninggalkan pangkalan haram sejeurus melihat kehadiran anggota penguat kuasa atau individu yang tidak dikenali.

Seorang pemilik pangkalan haram ketika mendedahkan perkara itu kepada *Utusan Malaysia* berkata, CCTV yang dipasang tersebut dilengkapi dengan teknologi terbaru termasuk mampu berpusing 360 darjah dan rakaman definisi tinggi.

“Kebiasaannya CCTV ini dipasang di kawasan yang tersorok bagi mengelakkan ia daripada dikesan atau dilihat oleh orang awam dan pihak berkuasa.

“Bila ada kemudahan ini, kita dapat pantau setiap pergerakan keluar masuk ke kawasan pangkalan haram,” katanya.

Menurut polis, terdapat 128 pangkalan haram di sepanjang Sungai Golok bermula dari Pos Ibrahim Pencen di Rantau Panjang sehingga Pos Tanjong,



**TERDAPAT 128 pangkalan haram di sepanjang Sungai Golok yang menjadi transit kepada penyeludup untuk membawa keluar barangan subsidi ke negara jiran. - UTUSAN/ROHANA ISMAIL**

Pangkalan Kubor, Tumpat.

Selain itu katanya, pembinaan tembok yang tinggi dan dinding dari zink merupakan sebahagian daripada langkah ‘keselamatan’.

Katanya, langkah tersebut bertujuan menyusahkan pihak berkuasa untuk membuat pemantauan atau pemeriksaan ke atas pangkalan haram itu.

“Kebanyakan pangkalan haram ini dibina di atas tanah

persendirian. Bila bina atas tanah persendirian agak sukar untuk pasukan penguat kuasa membuat serbuan kerana mereka tidak boleh mencerooboh satu-satu kawasan tanpa kebenaran.

“Peranan utama pangkalan haram adalah sebagai transit sementara sebelum membawa barangan subsidi seperti minyak masak, petrol, diesel dan tepung dari Malaysia untuk diseludup ke Thailand,” ujarnya.

Pemilik itu berkata, kewujudan pangkalan haram bukan sesuatu yang baru tetapi sudah ada sejak berpuluh tahun lamanya.

Katanya, ia seiring dengan kegiatan penyeludupan di sempadan yang diwarisi turun temurun segelintir penduduk di sini.

Hasil tinjauan *Utusan Malaysia*, mendapati terdapat stor yang dibina dalam kawasan kediaman penduduk.